

Thursday, April 16, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

GOVERNOR CENSUS

Larsap, General (Retd) Vijay Kumar Singh-an vawiin khan India ram Chhiarpui 2027 atana Mizoram puma Houselisting and Housing kalpui tur inziahlul bultanna, Lok Bhavan, Aizawlah a nei.

Hemi hnu hian ram chhung hmun dangte rualin Mizoramah Houselisting and Housing chhiarpui kalpui tan a ni.

Larsap chuan chhiarpui buaipuitute chu hmaih awm lo tura theihtawp chhuah tura chahin, hriat thiam loh neite pawh tha taka hrilhfiah a, India ram chhiarpuia inziaklut vek thei tura tan la turin a chah a. A vawi khat nana digital census kalpui a ni chu phurawm a tih thu sawiin, a hlawhtlin ngei theih nan mipuite pawh chhiarpui buaipuitute tha taka lo tawiawm turin a chah bawk.

VC

Chhiarpui 2027 hi India rama digital census hmasa ber tur niin, thawh hniha kalpui tur a ni a. Thawh khatna Houselisting and Housing hi kumin April ni 1 atang khan kalpui tan a ni a. Thawh hnihna, Population Enumeration hi February 2027-ah neih tan tur a ni thung ang. Thawh khatna hnuaiah hian April 1, 2026 atanga April 15, 2026 chhung khan mahni inziahlul Self-Enumeration neih a lo ni tawh a, vawiin atanga May 15 thleng hian Houselisting and Housing kalpui a ni ang.



CESJ PROTEST CUUTING OF AR TREES

Centre for Environmental & Social Justice (CESJ) chuan Aizawl Bazar Bungkawn leh Dâk Inpui inkar kawng tihzauhna tura sorkarin Lammual chhehvel kawngpui hnaia ding thingkung engemaw zat kih tura hma a lakna chu dodalin, nimin leh vawiin khan thingkit tura sorkarin a rawihte an dang a; CESJ Working Chairman Pi Vanramchhuangi chuan thih huamin an dodal zel dawn a ti.

Pi Vanramchhuangi chuan Akashvani News Aizawl zawhna chhangin, sorkarin thing kit zâwnga kawngpui tih zauh a tumna chu tha lo an tih thu a sawi a, kawngpui zau tha leh nuam chu anni pawhin an duh tho rualin, helai hmun zîmtea thing 176 lai kawng tihzauh nana kih hian Aizawl khawpui traffic tawt a tihziawm phah an rin loh thu a sawi a ni.

Sorkarin thing kih tur a chhinchhiah 176-te hi venghim turin thih huamin an tang dawn tih sawiin Pi Vanramchhuangi chuan, India ramah thing humhalha hmalakna lian tak tak a lo awm tawh a, Assam Rifles-in Lammual leh a chhehvel an chhuahsan hma deuh khan thing awmzat chhiarna an neih thu a sawi a, thing 480 vel an chhiar a, chu'ng zingah chuan khawvela thing vâng tak tak leh boruak tha (oxygen) pe chhuak hnem tak takte pawh a awm a, thih huama an hmalaknin awmzia a neih loh chuan Court hial pawh an kal dawn tih a sawi.

Pi Vanramchhuangi chuan hmasawna hnathawh an dodal hrim hrim a nih loh thu sawiin, kawng tihzauhna tura thing kih aiah phunsawn mai tura PWD an ngen thu leh thingchu kit kher loa lirtheiin an hel mai theih tura kawngpui tizau zawk tura an ngen thu a sawi bawk.



J MALSAWMA RTI

Langtlang taka MUHCS kalpui turin Mizoram Information Commission in Mizoram Health Care Society a hriattir a, Synod Hospital nena inremna a thlawna pe turin SPIO a hriattir.

Advocate J.Malsawmzuala Vanchhawng in RTI hmanga zawhna a siam, a hunna chhan a nih loh vang leh chhanna a dawnah a lungawi loh thu a thlen chu Mizoram Information Commission full bench chuan tun thla ni 9 khan a ngaihtuah a, Hearing-ah hian complaint thehluttu leh Mizoram State Health Care Society SPIO leh RTI zawhna luh hunlaia SPIO te an inlan a, Mizoram Health Care Society leh Synod Hospital ten MUHCS kalpuina tura inremna an ziah copy leh detail pricing chu tun thla ni 17 naktuk ral hmaa Complainant hnena a thlawna pe turin State Information Commission hian SPIO chu a thu a pe a ni.

MUHCS kalpuinaah mipui sum hman a ni chungin sorkar chuan thup tam tak a nei niin Complaint thehluttu hian a sawi a, Mizoram Health Care Society in Damdawi In hrang hrangte inremna a ziahpuiah thuruk anga vawn tur tih tarlanna 'Confidentiality Clause' dahlut telin, hemi behchhana hmang hian Damdawiin hrang hrang nena inremna an siamte chu mipui hriat theih loh turin an thup tlat a. Mizorama Private Hospital-te pawhin Mizoram chung leh pawn lam Pvt. Hospital dangte leh sorkar inremna siam dan an hriat theih loh avangin vawiin thlengin MUCHS an zawm theih loh phah a, a tuartu chu MUHCS zawmtu, sorkar hnathawk, pensioner leh mipui nawlpui, damlote an nih leh si avangin Appeal hi a thehlut tih Complainant hian a sawi.

